

# INUIT ATAQATIGIIT

## Inatsisartuni



UKA 2018/215  
02.10.18.  
Peter Olsen

**Uunga siunnersuut: Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaata allanngortinneqarnera pillugu Inatsisartut inatsisaat nr. xx, xx. xxx 2018-imeersoq (Taarsigassarsianik sioqqutsilluni akiliisarneq)**  
(Ineqarnermut Attaveqaqatigiinnermullu Naalakkersuisoq)

Naalakkersuisut aalajangiiffigissassatut siunnersuutaannut qulaani pineqartumut qujalluta, Inuit Ataqatigiinniit matumuuna imaattumik oqaaseqaateqassaagut.

Soorlu Naalakkersuisut aamma namminneq taamatut inatsisissasut siunnersuuteqarnerminni tunngavilersuutigisamittut oqaatigereeraat, una inatsisissatut siunnersuut;

Inissianut aningaasalersuisarneq pillugu inatsisartut inatsisaata nr. 39-p, 23. november 2017-imeersup aamma piginneqatigiilluni inissiat pillugit inatsisartut inatsisaata nr. 33-p, 23. november 2017-imeersup akuerineqarnerani taarsigassarsiat siusinaarluni maanna naliusut malillugit akilerneqarsinnaalerneranniit tunngaveqarpoq.

Inissiaqarnerup tungaatigut aaqqissuusseqqinnissaq Inuit Ataqatigiinniit qangali pingaartitatta anguniakkattalu ilagilluinnarpaat, taamaattumik siorna 2017-mi Naalakkersuisoqataanitta nalaani inatsimmik nutaamik pilersitsisoqarnera peqataaffigisimagatsigu nuannaarutigaarput.

Inatsisissarlu una pineqartoq siorna pilersitseqataaffigisimasatsinniit nangitsinerinnaamat nuannaarutigaarput tikilluaqqungaarparpullu.

Inatsisip siorna pilersitseqataaffigisimasatta, massakkullu uuma inatsisissap nutaap pilersinneqarneratigut innuttaasut pilertornerusumik aningaasanik attartornermikkut namminerisaminnik illuutiminnik, inissiaatiminnilluunniit piginnittunngorsinnaalernissaat periarfissinneqassaaq. Inatsisit nutaat taakku marluk pilersinneqarneratigut illuuteqalerniarluni aningaasat attartorsimasat ukiuni 20-ni erniaqartinnagit akilersorneqartariaqannginnerat, taassumalu kingorna ukiuni 15-ni erniaqartillugit taarsersugassat, tassa imaappoq aningaasat attartukkat katillugu ukiuni 35-ni pituttugaasumik akilersorneqartussaagaluartut, pilertornerusumik akilerneqarsinnaalernissaat periarfissiuunneqarpoq.

Aningaasanik attartukkanik piaarnerusumik akiliisoqarsinnaalerneratigut Namminersorlutik Oqartussat nutaanik inissialioqqissinnaalernissaminnut periarfissagissaarnerulernissaat aamma naatsorsuutigineqarpoq.

# INUIT ATAQATIGIIT

## Inatsisartuni



Naggataatigut periarfissaq manna iluatsillugu apeqqtigerusupparput una; Taavami assersuutigalugu illorput 2000-nik illuuteqalernikuusimasut tamakku qanoq pineqassappat? Tassami naluneqanngitsutut Illorput 2000-mik pisisimasut pituttugaasumik aatsaat ukiut 30-it qaangiunneranni tamakkiisumik piginnittunngorsinnaanerat inatsisiliunneqarnikuusimammat. Taamaattumik pineqartut pilertornersumik piginnittunngorsinnaanissaat aqutissiuunniarneqarnersut aamma paaserusunnarpoq.

Taamatut Inuit Ataqatigiiniit oqaaseqarluta, Naalakkersuisut siunnersuutaat taperserlugu ataatsimiisitaliamut susassaqartumut ingerlateqqinneqarnissaa inassuteqaatigaarput.

Qujanaq

Peter Olsen